

23/05/2003

Dr Amina mohon maaf, tarik balik kertas kerja

Wan Hazmir Bakar

KUALA LUMPUR: Profesor Madya Kajian Islam dari Virginia Commonwealth University, Dr Amina Wadud, yang mencetuskan kekecohan pada Perundingan Antarabangsa Kedua Pemimpin-Pemimpin Islam Dalam Menangani Isu HIV/Aids, semalam meminta maaf dan menarik balik kertas kerjanya yang dikatakan menghina Islam dan al-Quran.

Amina mengejutkan hadirin yang memenuhi ruang dewan persidangan itu apabila secara tiba-tiba menaiki pentas membuat pengumuman bahawa beliau tidak mahu kertas kerjanya bertajuk 'Vulnerabilities HIV and AIDS' itu menyebabkan lebih banyak gangguan.

"Tatkala saya menolak dakwaan sesiapa saja mengenai status kecintaan mendalam saya terhadap Allah dan Rasulullah atau keimanan dan kepercayaan

saya terhadap al-Quran sebagai kitab suci, saya memohon maaf jika nada atau pilihan perkataan dan analogi kertas kerja itu disalah tafsir atau menyakititi hati sesiapa saja di sini," katanya.

Tindakan Amina membuat permohonan maaf secara terbuka itu melegakan Pengerusi Jawatankuasa Penasihat Antarabangsa persidangan itu, Datuk Paduka Marina Mahathir, yang menyifatkannya sebagai sikap terpuji.

"Tiada sesiapa pun meminta, memujuk atau memaksa beliau berbuat sedemikian. Saya harap lebih ramai orang bersikap rendah diri seperti beliau," katanya sambil mengakui beliau emosional sepanjang insiden itu.

Kelmarin, Marina menawarkan untuk melepaskan jawatannya sebagai mengambil tanggungjawab berikutan kekecohan itu.

Bagaimanapun, dalam permohonan maaf itu, Amina tetap mempertahankan kertas kerjanya itu yang disifatkan sebagai sekadar mempersoalkan kemungkinan, bukan memberi cadangan.

"Jelaslah di sini bukan forum terbaik untuk kertas kerja seperti ini yang lebih bertujuan mempersoalkan kemungkinan daripada memberikan cadangan positif atau objektif," katanya.

Sementara itu, Pengerusi Majlis Fatwa Kebangsaan, Datuk Dr Ismail Ibrahim meminta penganjur seminar antarabangsa yang membabitkan isu Islam

supaya berwaspada dengan cubaan kumpulan yang membuat tafsiran salah mengenai ajaran Islam.

"Pada masa depan, kita perlu lebih berhati-hati apabila menganjurkan seminar seperti itu kerana ada orang di luar sana yang mahu menggunakan platform seperti itu untuk tujuan tertentu, termasuk menyerang Islam," katanya selepas persidangan itu.

Beliau berkata: "Al-Quran tidak boleh ditafsir mengikut logik atau berdasarkan kepentingan atau niat seseorang itu."

Katanya, penganjur seharusnya memeriksa kertas kerja yang akan dibentang

kerana banyak masa terbuang apabila pembentangnya berhujah mengenai isu tidak relevan dengan tema persidangan iaitu mencari kaedah menyuntik dimensi Islam dalam memerangi penyakit yang membunuh berjuta-juta orang setahun.